

四庫全書

集部

欽定四庫全書

集部

姑溪居士前集卷

一至五

詳校官庶吉士臣吳烜

侍讀臣孫球覆勘

總校官編修臣王燕緒

校對官編修臣吳舒帷

謄錄監生臣趙興吾

欽定四庫全書

集部三

姑溪居士前集

別集類二 宋

提要

臣等謹案姑溪居士前集五十卷後集二十卷宋李之儀撰之儀字端叔宋史稱滄州無棣人而吳芾作前集序乃曰景城人考元豐九域志熙寧六年省景城入樂壽則當為樂壽人史殆因滄州景城郡橫海軍節度治平

九年嘗由清池徙治無棣遂誤以景城即無棣也陳氏書錄解題據所題郡望稱為趙郡人蓋失之矣之儀元豐中舉進士元祐初為樞密院編修官通判原州元符中監內香藥庫以嘗從蘓軾幕府為御史石豫劾罷崇寧初提舉河東常平坐草范純仁遺表過於鯁直忤蔡京意編管太平是編前集五十卷為乾道丁亥吳芾所輯並為之序姑溪居士之

儀南遷後自號因以名其集也後集二十卷
不知誰編然文獻通攷已著錄則亦出宋人
手矣之儀在元祐熙寧間文章與張耒秦觀
相上下王明清揮麈後錄稱其尺牘最工然
他作亦皆神鋒俊逸往往具蘓軾之一體蓋
氣類漸染與之化也其詩名稍不及黃陳論
者因蘓軾題其詩後有暫借好詩消永夜每
逢佳處輒叅禪句遂以為諷其過於僻澁今

觀集中諸詩雖魄力雄厚不足敵軾然大抵
軒豁磊落實無郊島鉤棘艱苦之狀註蘓詩
者殆附會其詞非軾本意矣乾隆四十六年
五月恭校上

總纂官

臣紀昀

臣陸錫熊

臣孫士毅

總校官
臣陸費墀

姑溪居士前集序

李公端叔以詞翰著名元祐間余始得其尺牘頗愛其
言思清婉有晉宋人風味恨未覩他製也乾道丁亥假
守當塗因訪古來文士居此邦而卓然有聲于世者惟
李太白郭功父與端叔三人郡舊有太白功父集而端
叔獨闕然求于其家而子孫往往散落無復遺稿間得
之邦人類而聚之命郡士戴翬訂正釐為五十卷鋟板
于學昔二蘇于文章少許可尤稱重端叔殆與黃魯直

晁無咎張文潛秦少游輩頡頏于時今觀其文信可知
已或謂端叔晚節銳于進取有所附麗雖若可疑然范
忠宣公遺奏極于鯁切詆斥不顧一時用事者欲寘忠
宣之子于理端叔慨然自列謂實出其手既而公所為
忠宣行狀復出由是得罪南遷廢錮終身曾不少悔其
勇于義若此詎可以微瑕掩之哉余固愛其文又表其
行誼之可嘉者并以詔于後云端叔名之儀其先景城
人既謫而南始居姑溪自號姑溪居士今以名其集天

台吳節序

欽定四庫全書

姑溪居士前集卷一

宋 李之儀 撰

古賦

閒居賦

嗚呼閒居之為樂也樂其所可樂也樂非其可樂不為
閒居也樂其居之閒然後知閒居之為可樂也迹雖是
而心不在焉與夫故為其迹而資以藉口者乃閒居之

戮民非樂閒居者也樂其樂者君子之樂也未始知其樂而盜有其名者小人之樂也潘岳之賦名則是矣而心則不閒也矢志自寓其無可奈何而形容其不得已者也戮民不足以言之也陶淵明歸去來似無頃刻休息而超然自放于造物之外陶然自得于言意之表居不閒而得閒居之樂也有一念不為閒有一境界不為居形如槁木心如死灰尸居而龍見雷聲而淵默得其一未知其二也終日言而未嘗言終日行而未嘗行其

庶幾乎孔子居鄉黨似不能言者其言曰毋意毋必毋
固毋我又曰予欲無言又曰吾與回言終日不違如愚
申申如也天天如也僂僂然如喪家之犬也魯人則曰
此東家丘耳夫是謂之閒居而樂不足以言之也漢儒
所記閒居燕居是其日用之常而非其所得之樂也惟
彼不類造次必僞于以行已狼籍自棄蒙不潔而反以
銜鬻蹈荆棘而不知所避務淺陋之為夸而不識人間
有羞恥事方且忽婁猪艾豕之歌而擁宋朝之弊帚安

燕婉遽除之刺而歸河水而高峙杜門却掃而閭里坐
視其左右動容變色而肉食率懷其可畏一顰一笑惟
我之從則言發而利害隨之一動一靜立我之異則頤
指而百罹斯值以是而日輸月賦如征焉以是而山積
海納如歸焉乃曰我閒居者也是又潘岳之罪人而謂
聖日在上為可免則予不知其所以也

古詩一

謁李太白祠

愛君獨酌板橋句想君不向稽山時千載風流同一轍
孤墳數尺埋蒿藜文章誤人豈當日聲名雖好終何為
譬之花卉自開落又如時鳥啼高低行吟漫葬江魚腹
鵬來空賦予何之君不見吾腰恥為小兒折或車或棹
聊為期又不見羸顛劉蹶不到耳採花摘實相維持春
寒漠漠青山路厚顏已覺歸來遲一廬尚冀容此老與
君朽骨分東西

累日氣候差暖梅花輒已弄色聊課童僕芟削

培灌以助其發戲成小詩三首

京洛三十年作客每見梅花欲忘食時時魂夢到江南
足跡塵埃來不得嗅香嚼蕊不忍捨為憐絕韻真顏色
誰知晚得江南身特此一株當舍北寒根老拚初不辨
幾與桑榆同棄擲慙慙地主故指示頓覺翛然超眼域
幾山氣候也深春戢戢枝頭危欲坼呼奴隣家借刀斧
穿斷因之聊拂拭便宜邀月作嘉賓不惜淋漓慰疇昔
邂逅梅花同作客此理雖龜亦難食道人無眼自超羣

定裏觀之想應得為惜花開將及時枕上朝朝問天色
自是春工力尚堅一向風頭來自北昨夜雪深幾一尺
不覺起來欲跳躑雪過春回固可期聊與此花為畛域
今朝舉頭消息別物理人情原未圻綠萼柔條宛相契
正色真香淨如拭更煩妙語為詮評莫遣塵根迷夙昔
花是主人身是客更欲花前羅酒食花應笑我強相親
畢竟人花誰是得金樽到手我自醉道人何妨且觀色
三界觀來即是空醉裏寧知漸遊北等為圓鏡隨身現

認着分明却虛擲持此問花花不答嗟我與君徒入域
不如收却閒眼坐萬境紛紛在披拆一番風雨便紛飛
念垢情塵漫磨拭今年春盡有明年花落花開幾今昔

彥行和梅詩甚工輒次元韻

春風不揀尊前客未必藜羹輸肉食玲瓏點綴移月窟
誰謂吾家最先得直從去臘約為伴旦旦相看無倦色
朝披日彩爛迎東夜棹斗杓寒桂北擬將西子作孤注
對與春工分一擲又疑妖冶瀆清真子細籌量信難域

發狂不意落紙上勝句爭來共推圻諸郎獨殿語尤老
似欲塵埃劇湔拭不惟詩社頓光輝枝上分明過於昔

次韻君俞病中見寄

老眼逢春如有隔不覺花前手頻拭昔陪韋杜尺五天
此地去天今幾尺東家有客貪春甚酒作衾裯花作枕
瘦逼休文臂漸消渴近相如尤殢飲賞心直以花為命
醉頭只恐扶難正春歸每恨太忙生不惜一春常似病
我老無用終安之屢欲從君獨較遲方將結束窮勝致

投懽祇許春相知詩來苦訴不自樂春固惱人多索寞
何妨強襲起應劉間促扁舟尋李郭君不見樂羊功名
方煜煜歸來謗書已盈篋爭如隨地任低昂漫浪猗玗
盡元結

題步雲亭

昨夜風高蟬半咽起來知是白露節玉面少年窄袖衫
袖裏新詩似冰雪幾日炎炎如甑中今朝忽覺超樊籠
不惟氣候已八月更得冰雪開心胸謝公山人詩筆奇

問君何緣得此詩報我我欲步雲去山人許我因留題
君作斯亭幾許高擬推皓魄翻銀濤誰謂姮娥落君手
坐遣山人詩思勞君不見梅老句出天地窄曾謂山人
真太白采石月下憶相逢笑披錦袍弄明月十年明月
歸謫仙姮娥豈得在君邊何妨邀取山人去卒歲扶攜
醉笑間

題渭濱亭

廣張三千六百鈞太公欲與文王親文王不為熊羆獵

卜年七百終何人開元天子降步輦當日何如渭濱見
是同是異不可詰一等風雲符虎變吾君好賢軼前古
處處鵷鷺刷修羽觀君命意非苟然他日風流須再覩

題山堂

二年江南客對面不見山負我愛山心兀兀塵埃間一
聞說山心便喜欲插修翰遽飛起君家乃是山中居永
日青山同徙倚流泉涓涓薜蘿暗明月時時窺枕簟三
伏清霜帶雪來不斷烟雲擁攔檻只恐居山興易闌萬

壑波濤翻等閒知有心期難得否憑君借與畫圖看

送儲子椿參假太學時泊舟金陵風亭

金陵二月春江上連日雨暖風初報一番晴綠淺紅深
紛無數與君已是隔年別相逢又作臨分語感君情重故
可歌送君心折不成舞五年相從如一日物物講評窮
髮縷愛君正如韞上鷹畏君何翅文中虎未飯已知必
下趙憑軾會觀終報楚逡巡照眼綠袍新更約十分同
一舉

走筆贈報寧老

半山老人筆如掾落筆直欲拏雲烟東亭右軍不復見
龍跳虎卧誰爭先姑溪六月汗流水邂逅清風頓如洗
他時問法到山前應許神光得吾髓

和郭功甫遊采石

卒歲悵悵無地雪三首新詩報明發使君近作采石遊
勝踐傳聞驚久缺亢陽便有欲雪意和氣先期振巖穴
想見旌旗錦繡張如從元君朝北闕後攜一老何奇哉

朱顏鶴髮超塵埃，嗷呼江上來。席上迤邐萬古隨，雲開
騎鯨仙人不敢避。玉鏡臺郎俄復迴，分明月下遇賞歎。
將軍新自天邊來，逡巡落筆轟春雷。落花亂點荒池臺，
沈埋蓁莽見一日名高。此地真當才從來，不許說前輩。
寄聲魚鳥休驚猜，直疑乘槎叩月窟。又若登臨望天台，
酒行已徹更須酌。醉倒寧辭無算杯，卓然一段極則事。
遣我擊節因誰催。

采石三題

捉月亭

李太白

卷一

我昔揚帆下廬阜落帆采石春欲暮江南江北只見山
欲識錦袍無問處夜深明月來青天天水茫茫月連霧
想見扁舟捉月時江心見月如相遇醉魂不制月可捉
捉得便將天外去月在人亡天莫詰髣髴風流誰與晤
邇來水落洲渚出隔岸潮迴疑可步聒耳啁啾不得聞
對案腥臊難下筯多情禪客饒佳趣粉飾餘光扶墜緒
欲回古月換今人到此翛然忘世慮從來喜誦騎鯨句

亦復買田相近住會當載酒十分圓同指虛無問征路

賞詠亭

袁彥伯

爨下得餘薪便可歌南風參差長路鐸鼓樂俄相同一
棄一流落悠然會天工始知盛衰際遇與不遇中風清
月正好爽晤聊從容豈意接心期賞歎如雲龍千載瞬
息爾轉盼歸虛空何適非適然神交付冥鴻

鑑然亭

溫太真

溫公天下士百計興艱危大廈勢已傾意欲一木支功

名等山岳德澤均雨露奈何談笑間而取鬼神怒鬼神
豈不鑒忠義當扶持一見亦何傷冥路俄與期似非理
所安端恐數應盡邂逅不可逃紛紛遂為信孔子昔有
言既敬亦須遠三復而三思臨風更三歎

姑溪居士前集卷一

欽定四庫全書

姑溪居士前集卷二

宋 李之儀 撰

古詩二

七言古風寄題薛公尉氏逍遙閣兼送伯成知
縣宣德解印當塗直書民言耳非所謂詩也

長身少髯復多骨憶在兒時獲相識滿朝善類推老成
鄉曲名流誦才德爾來契闊四十年停鸞峙鵠欣相傳

我方却歸不自得但覺和氣如春天往日朝門多可熱
今朝吏爨幾無烟追呼輩伍殆千指一旦束手蠶如眠
父老相傳語且泣岌岌流離遽安集省事以來無此君
豫恐他時莫能及尺紙胡為來北闕樂境危城俄見敘
覆盆雖光亦慙爾所惜時間未能雪稍傳遠近或歎喜
歎者吾民喜者吏吏至酌酒更相賀畢竟卷舒須在我
父老沾襟嗟薄福此理冥冥定誰坐異時得君逾所聞
杳杳健鶻盤霜旻信矣此地不可久空使遺愛傳邦人

邦人姑止聽我語逍遙閣去天尺五長身仙翁昔遊戲
日日烟雲泛躡屐仙翁久已朝紫皇功行不泯鍾諸郎
扶疎密蔭被所至遂令此閣如甘棠我昔西畿數來往
日脚闌干猶可想塵埃滿袂阻登臨白髮心期負真賞
六月炎炎汗如洗江南雨多拍隄水旗開鼓響船欲發
超然爽意因君起驂騑一跌愈莫止大鵬會展滄溟翅
何妨閣下敞高門更看陰功動閭里

送芝老

江頭春色已可掬風雨惱人常不足
筆刀俱來紙上春
牆外落紅爭較較忽然別我下廬山
蓮社風流指顧間
為我寄聲陶五柳少留佳處共追攀

題王德循書院壁

謝韓君錫小會

熱不就惡木枝渴不飲盜泉水
古人不可期歲月姑相
委不愛爾井泉百尺深不愛爾庭樹
千里陰相看豈持
一飯報長嘯聊為猛虎吟

近得石菖蒲胡伯鎮見之謂必以錦石資藉乃

可以久遽徹所有為貺仍枉佳句輒次韻奉謝
倒屣得小異不言四時備遺我百明珠書窗遽增氣石
盆叢秀轉光輝攜挈衰慵絕塵世更煩藻思玄維持紙
上盆中盡珍琲他時相對擘麟脯何必方平為紹介

丁德儒置酒適與陳君俞聯坐聊賦小詩為君
俞謝因以贖先起之罪

春風不解事吼地如雷霆誰知一席間笑語燈熒熒主
人意彌敦設置不少停而我槁木然感慨時自驚多情

接勝友孤朗如初星微吟間相警似欲慰獨醒我老百
不堪已分如漂萍邂逅因事樂尚或有此形不慚引去
先得意耳暫清晨展轉尋斷夢間闕媿微生何當萬里浪
相與同滄溟

贈劉九思山人

我行亦偶然君來定何謂風高浪如山聞者亦已畏而
君從一葉過我乃特地郵亭六日俱臨行尤自媿朝出
纔辨色夜歸或霑醉殘燈不見人待我獨忘睡語款多

破顏情極幾屑涕屈指再相從便作新井計我擔既弛
肩君駕亦方稅不覺涉四年俯仰纔一喟每見意每加
終始不少替顧匪求名頑豈不懷此義凡生等飄蓬何
物非委蛻為我謝故人隨方聊自慰

題繁川徐氏孝嚴亭

戀戀欲報恩歲月猶過隙常恐寸草暉終負陽和力萬
鍾非所養所重在以色庶幾參與騫不獨慕今昔千尋
用或短乃未及咫尺哀哉過隙心淚盡墳草碧坐見食

亦覩幽明固無隔蒸嘗雖其時要是未為得詩書聖人
事力久真自積卷舒豈他人悲孝均我職尚容表龜趺
過者必此式長江會生塵德輝何可及

次韻秦處度同登黃山

艱生縲紲餘特爾脫魑魅殊方窟飄蓬未免遊戲事眼
力到毛髮抉剔盡竒秘邂逅平生歡笑語當歌吹曲環
豈人謀明滅殆天吏慰我雲烟期有覩鴻鵠志百年一
瞬爾幸比半日地聊攄廣莫心無作雍門淚

處度再和前詩見寄復次韻報之頃有所約今
不逮悲愴無已題于褒禪方丈

愛山平生心殆若鬼所魅茲遊媿不早危至失吾事佳
辰秋正晴有物不自秘晶熒麗初陽浮動薦微吹幅巾
方袍接固可稱傲吏躋攀敢惜力卜築豈無志稽首定
明老願借一席地何在眼中人不覺衣上淚

次韻陳君俞攜酒見過

野人欣莫逆君子戒多上幸爾違朝市聊復圖蕙帳薄

田幾負郭山水分背向巾車俯秋成舒嘯會隨杖吾友
真可人輕舟數相訪投懷失枯槁達意信搖蕩時哉固
難得觸境沈波浪謂我來歲寒種種不少創杯盤挽氣
類論辨極戶量敢辭屢舉白自喜老彌壯回頭易陳迹
傾倒乃惆悵樂事須勉旃何適非醞釀

迎暉閣

霜風吹我衣日短歸路長放懷即可家何適非吾鄉稍
聞東南隅勝致寓一方超然世外人雞黍隨低昂簷甍

闢無際戶牖延初光孰云日月久但知歲時康每逢會
心處萬境不得藏何當駕修輪飛雲共回翔淋漓非所
期遠目聊徜徉庶幾蟹眼白打出鵝兒黃

張君好藏茶
多能識土人

歲入貢必迂路以致
其新故名聞江上

和遊一人泉

新詩解人頤秀若披雲鬢突然不可揖平地翻波瀾
衣袂招攜每見輒汗顏況茲天際遊物理知難攀一來
金陵居終歲不得閒勝踐固疇昔欲往獨見刪命駕等

人爾底事獨我慳豈非勒移靈不許汚名山因詩想其
人愛來直仍彎裂臍那復惜頓足已滯頑清甘似可飽
忽遽誰其還何當強扶老寄迹雲霞間要須君意果莫
遣我盟寒曉來雨脚斷去夢已班班

秀遠堂次趙德孺韻

韓君錫起秀遠堂結中隱菴趙太傅德孺賦秀遠堂
詩云

翰林李謫仙埋骨青山下平生愛此山老去終不捨

放逐鷓鴣行追隨雞黍社文采今尚存英風滿松楸
寥寥五百年好尚世所寡韓子荊州後為求襲良治
乃祖當時輩異代同瀟洒結堂山之陽真趣非少假
秀色來天外遠勢包平野烟嵐浮翠黛攬之不容把
徜徉盤谷遊屢請秣吾馬時無謫仙人登臨誰賦者
九原如可作一奠招魂斚

愛山依山住如山不少下山中所有多惟取不容捨烟
雲實交遊松竹乃保社尚欠目所窮披翦寧問櫟廓然

宇宙寬信矣和無寡隱隱徹四垂萬象入坯冶初疑彩
間錯又若墨勾洒造化非適然一一類見假吾友端可
人韻勝不少野更將桃李俱參差移拱把時哉須自勉
歲月甚奔馬得難未易失詎有長年者何妨倒載歸日
日無虛聲

中隱菴次趙德孺韻

德孺中隱菴詩云

在昔避世賢隱居豈自喜甘守西山餓清洗潁陽耳

一旦事高尚萬古激貪鄙孰謂樂山林便可輕朝市
竊笑效顰人不知捧心美妾將凡庸姿敢希明哲軌
盜此嘉遯名紛若干時子仕途指捷徑矯偽汙青史
聖朝揚仄陋采錄無遐邇不遺下體葑況乃中鄉邑
多士生此時貧且賤焉恥夢自傳巖來獵從渭濱起
隱君聞此風翻然烏可已聊為知者道庶達名菴旨
退之以文鳴詩友得侯喜聲名力與俱雖尊未勇耳潢
池詎青山孰辨都與鄙菴成誰振之句出開如市千仞

寧我高充實信我美坐令菴內人前車云可軌禮樂有
先後後進則君子執方而昧圓俱野那復史伐柯固執
柯疇克求諸邇蒸之既匪薪采焉又非芑近交韓與侯
步驟亦常恥一醫消息盡布毛自何起要須六月息不
息不為已敢問二詩人如何得意旨

莊居值雨偶得十詩示秦處度

累日雨不止風高如作寒三分雖過二忽忽便向閑一
身百憂集況可計先懽不見是無悶念此聊自寬

滿眼多是水歲事從可知早時謂有餘今空未免饑一
雨又三日見者皆攢眉天作人承之到此終何為

我雖非故侯通籍三十年孰不夷險半而我終歲難念
非跣弗視不覺乘波瀾餘生豈所期我君信如天

平生三四友一一人中英況逢不世主唾手可太平參
差十年間契濶而死生相見復何語但有淚如傾

死生固可嗟一謫輒不返君恩非不深奈爾道路遠反
初不忍歌折臂信能遣已矣何足論幸子真入眼

念我宜州兄見時論弟昆詩書固分路翰墨俄同門人
誰不歸來獨沾死後恩萬里一銘旌猶能葬家原

夕郎天下士異同親見之欲掩不可得交口終何為百
汰剛愈精魑魅今尚疑浮雲空去來皎皎端所期

不返故鄉義何妨陸子居昔游既有約是豈人所圖我
嘗邀此卜蹭蹬不自如憑將一掬淚聊寄夜臺書

向晚風斗轉場上稻已芽問雨何薄相偏來戲吾家蟋

蟀牀下吟

闕

戒寒謂稍疎行矣逢此嗟

競爽聯夜光一箇乃明月吾友不可見賴爾相怡悅
葦葦空非倚聲聞乃不輟啜菽安暮年足以闕

姑溪居士前集卷二

欽定四庫全書

姑溪居士前集卷三

宋 李之儀 撰

古詩三

歌行附

題楊子儀虎圖

秋陰報初寒慘慘日遽晚有客自宣城明爽叩昏懶手
持兩巨軸六幅從而展披圖畫如生竟軸詩盡選平生
說匡鼎今日真到眼何止辨騮驪于焉識淄渑愛之不

能已欲挂恨壁短猶冀逢他時更疑探深遠

送人

冥冥天邊鴻蕩蕩風中雲一笑偶相逢擊節聊送君我
室豈無酒胡為不開樽所貴樂文字固非異猶薰天門
直牛渚南北如相分想君月下吟未厭俚語聞霜空夜
自明江月寒微昏會當借饑鯨永謝五濁渾

書長干僧房

昨日方得書經年不相見書來必累幅分明如見面雖

同雨千花略不通一線誰云非吉祥便是金毛現

和人雪意

雪意與春約野情因物裁輒將無窮思聊摛有限才雲
容忽破碎山色如招回攜持固夙昔端為此濟來歲晚
君羈旅徵君誰我陪祇恐造化工特地吹葭灰一剖不
復收寂爾為之胚戢戢競秀發翩翩絕嫌猜恍然徙倚
間浩蕩心胸開境界適何許次第分隅隈高足超日觀
塗如下離堆四顧始無間忽覺驚初雷有形均難悉無

物非蒿萊却應求仙源失路迷天台波臣復笑屈市門
徒德梅庶幾未始得掇拾同舉杯攘袂即千古一醉姑
相媒

和人感懷

高山在平地高山地焉知明珠出深淵明珠淵豈期高明
屬在人惟要須其時物理固如此了不差毫釐身世端自
窘歲月相奔馳所以得免勉吾人惟能詩我非知詩者
平昔竊好之每出每可愧未易皆損麁而君不我鄙

論極牙解頤六年如一日不取笑則疑彼鳥足為計有
類寧同嗤一朝召命至閭里增光輝不曰人可賢但從
外物移我賢君亦賢誰能窮是非我欲挽君留留君竟
何為聊作感慨別肯效兒女悲陳人不自信流品須維
持誰謂廊廟姿如我品乃宜江充與丙吉厚薄惟異施
其後七葉貂陰功終表儀是等代不乏浪爾分騶驪時
哉君何失儀鳳方臨池為我寄聲謝擊壤正自嬉勉旃
夔龍事賡載冀勿墮立賢本無方莫為陳言欺

次韻東坡所和滕希靖雪浪石詩古律各一詩

見後

卷

風波末路方奔屯屹然不動誰如尊豈知胸中瞰十日
顧盼不接無重昏東觀海市俯弱水南登赤壁凌江村
斯文未喪天豈遠出沒狐鼠徒千門綸巾羽扇晚自得
已聞漠北幾亡魂由來好趣入造化地靈特出雲濤根
生平到處苦再歷隱隱似有屐齒痕玻璃鏡裏萬象發
金粟堂中千偈論會須白玉漱寒水更借落月傾金盆

吐嗟菱溪成底物混沌空夸竅鑿存

甘露堂歌

炎天熇熇如湧湯使君置酒甘露堂無風但覺冷徹骨
坐來彷彿飛青霜使君顧客指新榜天假此應來輝光
八十里叟感盛事獻頌請名相激昂我非取專已上報
堯仁舜智方當陽邇來瑞應發處處中臺第一彤雲章
吾邦雖僻亦影響明德所祐真無疆已而轉盼欲受簡
慚非叟比疇能當輒因勝遇强黽勉庶幾擊壤同揄揚

吾君之澤不可象使君之惠何可忘才高名重偶暫屈
遺愛他日逾甘棠嗟予落莫徒自感乍鳴乍已如寒蟬
安時逐境姑委化隨緣致力聊為鄉時逢載酒問難字
未擬持筭操羣羊但知今日不易得縱不能飲須空觴

白鈴轄席上琵琶歌

青海傳烽沙遶塞謀將橐戈負不介却攜紅袖弄烟月
醉笑溪山窮物外文章聲名家世事投筆收功無十載
天子幾嗟相見晚暫許南來聊曠快一時賓客多可人

坐令五月如深春
畫棟潭潭簾半捲
濛濛香霧無纖塵
雲披霞散爛紅綠
滉漾無處投精神
秦樓風輕雁初泊
玉指如流乍前却
捍撥當胸拍屢催
一段風光來濩索
雖無儀鳳與舞獸
擊拊分明諧振躍
緱嶺排空午夜涼
杳杳鸞吟上寥廓
逡巡舞袖迴飛雪
紅茸毯襯鴉頭鞵
落花飛絮互繽紛
流星掣電爭明滅
主人情不已下客
歡正濃更邀姪姪
持金鍾從來酒戶
落人後歛斂不覺
隨手空金張燕接
平生慣照眼今朝
真未見敢辭醉倒

菊花偏只恐銀潢低曉箭釣天一夢固依稀欲問桃源
路已迷何時再到紅茸地更遣游絲惹住伊

雷塘行

鞭長不能及馬腹有限生涯時若促空使後人悲前人
雷塘春草年年綠誰知秀色若可餐風光付與初凭肩
力殫四海笑未已眉黛一螺當幾錢君不見黃金揀揀
回首蠹漠漠胡沙青塚暮公絃欲斷空自知千金漫買
長門賦膏油續盡天須曉石土餘壘可長保就令並蒂

永不分也應終恨雷塘草

姑溪居士前集卷三

欽定四庫全書

姑溪居士前集卷四

宋 李之儀 撰

律詩一

讀吳思道藏海詩集傲其體

唐末詩人自一家剪裁風月間鶯花憑陵墮緒篇篇勝
點綴餘妍字字斜遠水連天來怨笛爛霞烘日帶棲鴉
法書警句真如此流落桑榆重歎嗟

次韻東坡和滕希靖雪浪石詩

古詩見前卷

平生所願識荊州別乘還容接勝流異日崩騰驚海面
新詩清絕似槎頭常嗟盛事千年隔誰謂餘光一旦收
便覺時源得三昧目中無復有金牛

次韻東坡還自嶺南

憑陵歲月固難堪食蘂多來味却甘時雨纔聞徧中外
卧龍相繼起東南天邊鶴駕瞻仙袂雲裏詩牋帶海嵐
重見門生應不識雪髯霜鬢兩毵毵

寄邵暘叔發運

德門平昔仰高陽自是芝蘭根本香
未許藩籬承妙晤聊因文字借餘光
艤舟月下逢桓守盤馬樓前見庾郎
冬杪相期定如約為君雲影認鸞凰

次韻東坡沉香石詩

海南枯朽揀天長歲久峯巒帶蘚蒼
變化那知斲山骨儀刑空只在人腸
幾因皦日疑鑄蠟試沃清泉覺弄香
切莫輕珉亡什襲須防偷眼誤摧剛

送曾端伯之官濟北

貂蟬七葉想前人四世三公表一門虎步龍驤推贊冊
瑤環瑜珥見旁孫琅琅廟器真無敵衮衮淮流信有源
敝帚不堪終舊物吐茵行欲奉餘尊

濟上閒居

閉閣焚香萬慮澄莫云身似打包僧功名了未榮三事
理性容先契一燈丹竈鶴歸休炷火茶甌客訪旋敲冰
倦來却有登臨興上徹層樓最上層

告別子通

之儀早從粹翁子權遊于門下實為舊物也而子通
之賢益願見者非一朝夕于是踰月既蒙分榻延挹
又獲旦暮親炙告别遽有期懷戀不能已小詩以致
感遇

謝庭蘭玉舊聞名早歲風流接二兄白璧無瑕尊士望
青雲有路藹鄉評簞瓢弗改真天樂簪紱相高半學生
授館不為經宿去知心黃憲異袁閔

和儲子椿竹

何物能令意灑然陰森常對出簷竿排槍立戟誰為況
招月吟風好細看幾度驚回窗下夢新來添得雨中寒
傷心不見東坡老縱有驚溪下筆難

楚楚相親豈偶然依依隨處自成竿固應表見風塵外
莫作尋常草木看好事借名真有謂多言雖巧不能寒
相思乍可食無肉一日無君恰似難

和子椿七夕

何用封侯曲似鉤且將膚寸等岑樓佳時未用傾河鼓
爽氣先期勝蓐收月影正迷千古恨雨聲還助五更愁
王孫賞詠元無敵又見詩中第一流

題蘭皋

萬綠交陰別有天艤舟重到尚依然回頭白髮三千丈
倒指青編二十年賞詠未論臺閣舊維持今見子孫賢
何當關披陳迹再把重衾託醉眠

戲子徵魚次韻陳君俞寄題蘭皋

和風暖日作霜天冰雪相投豈偶然特枉新詩詠陳迹
便同佳趣賞當年學優曼倩三冬足才過荊州十部賢
為問醉衾應好在莫教癡望似蠶眠

題詒老小軒

高步毗盧頂上身旋開窗牖外風塵石菖蒲是從來友
龍焙茶為近日親不見同行木上座常留伴睡竹夫人
艱難歷盡無餘事問佛方知有此因

因過墳山齋僧值雪遂賦小詩

霜露悲傷老益增
輒憑精意託真乘
舞花忽報難遭瑞
佳氣冥符不盡燈
蔭葡萄園中紛一色
兜羅世界結千層
五天應供非虛語
從此雲頭日日升

送宣上人遊方

七軸蓮經誦已通
定將何事作家風
當知法界重重意
盡在雲遊步步中
金臂見時猶是妄
玉毫光處未為功
路頭全記文殊指
須着工夫子細窮

次韻郭功甫從何守遊白雲寺

已仕因循已過三買田歸去不須參高明漸擬凌清漢
皎潔方知在碧潭試酌甘泉來覺晚已躋絕頂尚猶貪
便應從此都無事祇有君恩未報慚

題白紵山

回見黃梅雨後天烟林常在笑談邊早時欲到不自果
今日初來端有緣無復新聲傳玉齒空餘殘照滿金田
不知誰是雲霞侶聊揖高風一悵然

石端若以朱絲欄見邀作而偶失所在久方得

之喜而賦詩寄丁希韓因以見及遂申前志次
韻

斷雁沈蹤共倚欄定應齊客解偷闕忽驚遼鶴排空至
何啻廉珠昨夜還假寵已慚名下誤強顏終愧筆頭慳
江流有盡情無盡須把高風付子山

再領玉局昔東坡翰林作詩送戴蒙有玉局他
年第幾人之句後自嶺外歸遂領玉局予復官
亦得之坡今亡矣悵然有懷

東坡因地夙相親玉局終為繼戴人祿仕豈知承末軌
恩光又許襲前塵青蠅附驥元非援白玉無瑕晚更真
泉下有靈應首肯不隨凡劣易緇磷

次韻葛大川喜王君相過并寄吳思道

君恩曾未報纖埃倦緒淹時鬱不開高義不忘轅下舊
好音常自日邊來欣逢雅好非空至頓感陽春泛酒迴
早晚退朝紅藥下細談陳迹共餘盃

呂吉甫第乃謝鎮西故居中間常為佛刹而雙

檜則舊物也劉夢得有詩因賦其韻

故國悲涼古木奇勢分庭下蔚相差霜根半露出林虎
畫影全舒破賊旗寶界曾迴鋪地色節旄還映挿雲枝
劉郎風韻知難敵儒帥端能表異時

題張湛然兄弟所居壁時謁之不見

樂全老子如星日真一仙人似鳳鸞早歲光明均照耀
異時文彩避高寒低回氣類追千劫邂逅風流得二難
環堵蕭然清徹骨却疑深雪卧袁安

湛然乃安
道之孫

李去言相別二年忽得書知在吳中答書偶成
官路相逢一笑休共知身世兩虛舟楚材有用誰青眼
趙將無功枉白頭會見姓名通北闕何妨風韻冠南州
求田接武如鳬鷖只欠元龍百尺樓

與珪元白相別之次日大雪火邊有懷其人

上人偶作十日留才別便覺如三秋應覺擁爐華藏客
不知對雪姑溪愁清詩字字吟可老冷日惜惜誰見投
媿我霜髯不用剪寒灰撥盡欲何求

次儲子椿金陵作別韻

千里波濤一葉中，急難平日但聞風。
自非積習有天得，那復間闕特地同。
樂事放懷須命酒，生涯何處不飄蓬。
先歸只作尋常別，切莫樽前感斷鴻。

又次子椿同君俞三詩

倦途回首已無牛，獨向田間涉早秋。
倚仗固知同失馬，攀援猶恐昧操舟。
漸逢陌上相推醉，尚有空中未下鷗。
可是道邊無葬地，肯將負世曲如鉤。

西來不復見青牛問遍生涯兩鬢秋但受郢人夸鼻斲
豈知蒙叟是腰舟柱頭寂寞千年鶴波面分明一點鷗
不向虛中問消息磻溪終老但垂鈎

隱隱山林似卧牛紛紛鑣擔喜逢秋虛名漫託三春柳
實際須歸萬斛舟未信此生真野馬且將餘日寄江鷗
崎嶇精衛人空笑終恐長鯨上直鈎

次韻子椿金陵相會詩

濛濛小雨落征帆漠漠烟雲遠近山屬意幾回真入夢

欲來常恨澁如灣
家程豈復嗟留滯
物外何妨且往還
便恐都人入圖畫
却應難寫是高閒

次韻子椿遊雨花臺同長老德正

勝遊自有經年約
佳客難同信步來
無復風烟翳寒日
漸催花柳映高臺
雲光故事空陳迹
玉樹遺音失舊哀
今昔循環等相視
欲尋歸路更遲回

又次莊居見貽佳什

茫茫巨浸託船歸
風不充帆氣易衰
猶喜歲寒逢逆旅

不將人事異當時從他老去知何用由是終焉豈自遺
獨有東阡南陌意莫辭扶杖數相期

姑溪居士前集卷四

欽定四庫全書

姑溪居士前集卷五

宋 李之儀 撰

律詩二

用聖行韻和呈幾仲

牢落郊原正早收
書來起我頓風流
絃歌韻裏識琴賤
鴻鵠飛時逢爽秋
極目烟雲來指顧
何時談笑共沈浮
文章落筆驚人眼
新有聲名舊姓侯

和人見寄二首

雍容閒雅許君都萬緒相逢一笑無休把盛衰觀世諦
且將言語共詩圖人亡人得同吹呖潮落潮生等據梧
只恐後庭歌不盡曲終翻被鬼揶揄

傾蓋相逢惜別離等閒談笑盡心期它年終解如今日
此念常應寄異時餘事不妨多蠟屐放懷贏得盛留詩
早攜桃葉尋歸路準擬花間倒接離

澄虛堂

公子高明悟劫灰鼎開軒語致幽懷
縈雲疊巘鏡天去
極目滄波入坐來千首詩成談笑裏
百分酒盡筦絃催
自憐曾是高堂客欲賦慚無宋玉才

和子椿

一番霖雨下商巖末路方收破冢帆
雞肋未能忘眴畝
驪珠還見發囊玉潤分餘浸回枯轍
色借陽春起陋緘
自是亨嘉相際會便應從此出塵凡

陋緘一作病杉

莊居寄友人

卷五
槐黃時節早相期留滯田園阻暫依聞道程文太超軼
却因詩句接光輝君能活計如公理我愧生涯負表微
已向青山託遺老不應專有謝玄暉

和友人見寄三首

明月平時敢自因特高蘭玉信吾人便從緱嶺如無媿
更許毗耶約問津每見似醺千日酒不言常備四時春
妙雲豈獨南遊契又喜鍾山近得鄰

俗駕難回固有因勒移終愧北山人不辭冒雨投歸步

始信忘形是要津一笑未容披軟語十分先覺報新春
定應偏契王郎便消得從來願卜鄰

除却吟詩總是塵道人應笑可憐人固知參請能成佛
未到升騰且咽津村落風烟常似臘禪房燈火已如春
會須隨例餐鉗子聊借明窗暫作鄰

舊懷二首

陳迹回頭似夢餘花應長好但人無詩成固已名千古
墓上誰傾飯一盂流落丹青驚始見形容筆墨竟難圖

公孫自是天同派漫託周人載碩膚

花存人往祇天知日暗心搖却自疑尚想漢庭傳詔令
如登魯廟見樽彝一時鸚鵡娛賓賦百世甘棠美召詩
安得殘春逢海上盡須衰淚灑新枝

送人入館閣

天祿崢嶸北斗齊享窮人欲去無梯自非終賈名偏重
祇恐蓬瀛到却迷鉛槧異時森杞梓功名他日看虹蜺
中朝若問姑溪老但道摧頽一木難

邂逅故人

湖山勝處得君家，懷祖曾於膝上誇。
不見多年應宦遠，相逢何事却天涯。
朱絃無復來湘水，駿骨分明產渥洼。
聞道賢勞多野處，新醅聊寄傲霜花。

已將身世等浮雲，又向江邊得故人。
數日暝寒埋雪意，一番佳境為時新。
村醅淡薄聊資笑，洞戶深閒自有春。
已幸隣封同寄老，却應風月費精神。

金陵懷古二首

焰燧何勞鼓萬牛聊將一帶付幽流
纔聞浮鷁來波上已見牽羊出石頭
舊穴依然披信汐古祠誰為薦時羞
功名到了成何事擾擾空移夜壑舟

霜天日晚獨沈吟潮上風來別是音
恃險戰爭休想舊凭高臨眺且論今
數聲鴈蹙千年恨一片帆驚萬里心
不是江山解磨折却應人物自升沈

和人見寄

壯志崢嶸不自神低回聊此接波臣
雖非腰重真騎鶴

猶勝途窮強泣麟
擊節久懷洲上晚
空樽未放網邊春
固知遺老能相契
翻愧公輸作幸民

邯鄲叢臺

禾黍離離露一丘
淡烟輕靄夕陽秋
微基西枕邯山盡
往事東隨漳水流
御輦金車何處去
閒花野草幾時休
可憐全趙繁華地
留作行人萬古愁

久雨次韻君俞

塵埃肺腑屢更時
淫雨平欺素領垂
忽覺光輝慰岑寂

坐令華茂轉離披中痛未厭徒空壁雅意安能系赤墀
獨有晴明陪擊節回腸尤在不為詩

次韻君俞瑞香

占盡韶華異衆芳分明絕艷降昭陽肯同繁杏撓春色
漫道幽蘭有國香大葉尚疑攢處髻馬嵬猶認去時囊
牡丹獨賞慈恩句只解金盃比發粧

次韻君俞四首

文章老去豈能神猶有殘膏占舊名賦就賈生空自感

詩成侯喜近聞聲拾塵已信非嘗飯撒豆終知不是兵
多謝嘉篇慰岑寂便思約伴問歸程

合浦圓光降下胎豫章千尺本天才未能海運參搏翼
聊復舟行共覆杯白髮情懷雖草莽青春消息自條枚
何妨接武窮幽致莫待風光却見催

語解驚人固有神始知無不是虛名方觀去接天邊翼
何事猶諧爨下聲齊晉近能通軟血江黃詎敢議慶兵
老來肺腑都荆棘頓欲搗鋤不計程

熊掌如何得豹胎
棄常嗜異信難才
端能不學邯鄲步
正可同嘗沆瀣杯
有意良圖休我老
他年吉卜佇君枚
雲間日下容相契
且置燃萁特地摧

堤上閒步二首

風旌江木信漂浮
散策騰騰亦謬悠
未必縈回能擢勝
却疑平遠解供愁
年衰易感難留日
機盡應無不下鷗
渡口舟橫晚潮急
一番佳意憶蘇州

暖風輕蹙浪花浮
留滯江城媿謝悠
吟苦空多屈原恨

賦殘猶剩庾郎愁，漸因卜築投歸鷺。
聊托潺湲習戲鷗，可笑麤官殺風景。
滿船絲管載涼州。

題韋深道寄傲軒

南窗何似北窗涼，寄傲來風各有方。
千古光輝如昨日，一時收拾付新堂。
已驚醖裏醅初綠，更覺籬邊菊漸黃。
就使主人官即顯，此門高興定難忘。

次韻君俞兼簡少孫六首

連壁魚金盡出倫，雪髯霜鬢信陳人。
能忘枘鑿方圓異，

許接風雲變化新絕韻淹時勞極目虛齋窮日但凝塵
何當一笑披環堵賴月吟哦未厭貧

殘編弊藁掩還開好意經年不暫來伏櫪已應真款段
脫鞵終擬謝低回頗傳共坐侵斜月更想微吟荐罰杯
居士從來少風味獨將愁眼望初梅

莫羨財多石季倫任從閭里笑長人五湖浪迹名終在
六印懸腰眼暫新且樂歌呼隨漑暈不妨文字洗留塵
年來頓覺珠璣富萬戶侯家却是貧

惓惓懷抱不曾開忽忽還添一歲來燈火香花隨贊祝
兒孫藩勝共徘徊休誇路寢當前拜誰得屠蘇最後杯
何物相期同一醉為君催發檻前梅

定應春到今日幾但覺耳邊多醉人已分餘生不如舊
却應佳句漸能新悲來徒有縈心淚情盡空驚滿眼塵
到得錐無真我輩一簞猶是作家貧

書空懶作咄咄語催老祇怪駸駸來斷夢已將愁共遠
離魂不覺淚驚回病餘想見嶄巖玉歡處猶懷宛轉杯

能伴晴和着履否深山應有未凋梅

觀東坡集

今朝又讀東坡集記得原州鞫獄時千首高吟賡欲遍
幾多強韻押無遺固知才氣原非敵獨有心期老不欺
淚盡九原無路見冰霜他日看青枝

姑溪居士前集卷五

欽定四庫全書

集部

姑溪居士前集卷六至十一

詳校官庶吉士臣吳烜

侍讀臣孫球覆勘

總校官編修臣王燕緒

校對官編修臣吳舒帷

謄錄監生臣趙興吾

欽定四庫全書

姑溪居士前集卷六

宋 李之儀 撰

律詩三 七言

再次韻奉送禹欽且堅再來之約

泠泠梅雨漲江濱
耿耿僧房借鉢人
秀色驚回隨念到
孤懷贏得暫時新
何妨一笑空諸有
更覺三摩淨六塵
憂患年來倍傷感
送君衰淚不容貧

相逢懷抱各全開
蔚結才舒倏又來
傾倒已辜將進酒
追隨休賦上林回
臨分莫作楚愁數
故事須詢河朔杯
看取滁翁宜自警
空將遺恨感蘇梅

襲前韻再簡少孫四首

由來氣類即天倫
孰謂劉琨獨可人
稍隔相從更無味
幾因拈起又還新
席間誰致龍皮異
雪裏常懷鶴羽塵
祇欲期君拾瑤草
庾郎三韭未為貧

雪意埋雲蔚不開
新春還傍故春來
未堪骭髀倚門立

聊復差池接羽回得喪但知求失馬盛衰羸取付傳杯
風流二妙天憐我種玉秧中更揀梅

子默清真本絕倫羊曇仍是箇中人林泉不作南風競
旗幟還因對壘新金鑛躍壚元有艷冰壺瑩月舊無塵
何妨再葺昆陽戰尋邑師行固不貧

記得金樽特地開舉頭新歲又重來銀潢已分經年隔
玉節猶期舊臘回干戈浪迷雲表夢百分愁寄燭殘杯
醉鄉誰謂無消息已覺歌聲傍落梅

次韻雪

臘日頻年未嘗雪
今春雪與臘俱來
暖歸白傳金蕉葉
寒逼溫郎玉鏡臺
幾處歡聲動絲竹
一番佳思近離堆
新詩不以尋梅見
萬里豐登氣已回

題張約之長春閣

江山信美亦人同
寒暑隨時興易窮
寓意果能超物境
養花長欲占春風
何須戶外屨常滿
自樂尊中酒不空
可笑道人猶有恨
一番紅盡一番紅

後圃

鵲鳩呼婦天欲雨杏子退花鶯未雛庭前已覺綠半毯
酒面忽有紅雙鳧芳物戀客不忍去主人好賢誰復如
會應百歲享此樂何妨畫作重屏圖

寄題子椿野軒

江山秀氣表吾人輦下開軒得趣新不擬舊遊離几席
常令每況隔埃塵客來談笑無非楚紙上文章近過秦
分我一枝頻見約乘槎行欲問通津

避暑無地偶過君俞聊資華屋廣蔭以揖主人
之勝綢繆禮意遂至抵暮君俞有詩因次韻二

首

無功衛鶴偶乘軒虛暑從誰解倒懸頓覺御風凌絕境
似逢調瑟認華年回光已幸參東壁裂地何須得酒泉
自惜抑揚非瓦礫倦途終愧失陶甄

十輪揚煇舊軒軒四壁相如似磬懸豈謂投懷忘晚節
每容佳處共流年笑談璀璨風生坐翰墨縱橫思湧泉

土苴固難重就器轉鈞尤幸識精甄

歸自錢塘伏蒙君俞特枉佳句欽歎不已聊賦

來韻

吳山陳迹已飛埃投老還驚病眼開似泛靈槎海邊去
却因華表鶴歸來情移客枕收殘夢恨著江梅戀故臺
便覺新篇資六翮飄飄真是子虛才

贈金陵榮天和

生涯已定不干時收拾工夫且作詩瀨水方來弔東野

同安初喜識丘遲兼將佛事資三昧又喜風騷出一支
投老相逢能幾許何堪得句每相期

劉君以地里之學各邂逅相遇求詩為別因賦

長句

久聞秘術獨超羣肯向青囊學景純解使山川如在掌
須知禍福不由人論功合附天仙籍底事猶隨客路塵
滿眼峯巒應有待何妨裁剪出精神

泊鎮客居傷春佳句輒賦元韻二首

休論莫莫與休休老眼逢春且暫留未必餘寒更能久
祇因殘藥易為揉及時行樂何妨剩感物興懷漫自愁
南北生涯等羈旅定應無著是清流

紛紛到底不如休空把閒心見便留昨日白消行處去
今朝綠遍定誰揉且從寂滅翻千偈安用深湛詠四愁
我坐言多欲無語每慚佳思枉詩流

次韻夾竹桃花

料理愁懷落那邊桃花烘日竹含烟牆紅密約連昌曉

夏木深藏繡嶺天
籃輦造門如會面
漁舟失路想當年

因君詠出黃荃筆
從此風光生彩牋

黃荃作夾竹桃花
屏風東川西川節

度使廳皆有之荃今不在以真花片補其缺處幾
不能辨枝上地下相契不差毫髮天下傳以為工

次韻聞笛

涓涓水咽衆山泉
隱隱雷驚二月天
共喜春工能應候
方知節物似烹鮮
倦途所欠無多子
勝日相逢又一年
好是羣花應競發
不須留待柳三眠

和郭功甫贈陳待制致仕二首

十年朝馬望前程晚作琳宮物外人
徹骨清風真有韻
醉心常德本來淳
新栽松菊開三徑
舊檢方書備六陳
不是詩翁形美頌丹青難寫自由身

南北紛紛不覺塵
鴛鴦湖水解留人
乳浮香焙誰同試
螳泛家窮分外淳
禪寂久因師粲可婚姻便可繼朱陳
莫從舊路尋歸夢占取東籬採菊身

和人三首

昂昂野鶴固難羣
皎皎冰壺不受塵
一笑每逢青眼舊

多情空愧白頭新
西風未用高紈扇
東道應容岸角巾
珍重長謠倚雲瑟
瀟湘誰是賞音人

經年牢落別離羣
準擬歸來拂路塵
妙語獨從書上得
歡悰猶欠坐中新
頗聞洛下傳佳句
更喜嵩陽識墊巾
幾欲軍門示巾幘
老來猶更不如人

荆溪風物記當時
吹絮河豚下箸遲
綠滿金田朝應供
紅殘朱檻夜論詩
幅巾已託遺民後
杓柄猶懷象骨疑
早晚雲間見金臂
空懸翠竹漫抽枝

次韻採蓮

聞道栽成十畝蓮，便思挑出杖頭錢。
定知荇菜參差處，不是決明顏色鮮。
紅日半移芳草岸，清歌低泛木蘭船。
驚心未得同真賞，空媿諸豪白玉篇。

復次韻

國西華麗占池蓮，曾記開樽奉賜錢。
幾欲漂流勞滯念，又驚紅綠映澄鮮。
主人無間容聯步，勝日何妨更買船。
滿挹香風振歸袂，更煩佳思出新篇。

幕府風流舊泛蓮
喬孫家世掩青錢
別開眼界霞爭爛
分得秋光菊未鮮
燈陣有心欺醉帽
珠盤何日瀉歸船
錦囊示我鏘金句
空媿巴吟綴後篇

次韻子椿莊居述懷

偶因秋藥記初春
增損元無爾自貧
病骨蕭條驚歲晚
新詩來往媿情親
未應謝傳終垂涕
誰為劉公是可人
艾火呻吟對搖落
不堪庭草又還新

次韻早秋

衝衝時序一郵亭睡美從今氣不蒸便好心期金葉酒
乍驚夢在玉壺冰栽松種竹來三徑效策輸龜待十朋
百尺樓高誰與共倦途初喜接陳登

同子椿遊三品石詩并尋三閣故基久之因以
次韻

桑柘丘墟輦路長景陽依舊在山陽石標官品名常在
井記胭脂迹半荒吊古漫勞興感慨寄懷聊以共彷徨
相看等是未推枕何日同驚夢後梁

陪曾延之泛舟歷湖至苦竹寺次韻陳致君席上所賦

已涼時節未霜前十里平湖共酒船
巖岫湧寒清澈水
芰荷翻浪綠連天
百年過眼真聊爾
一笑投懷豈適然
獨有黃花似迴避
定緣紅粉不能先

宿大乘贈祖燈

倦游知止未知還
平日生涯只在山
金碧喜逢雲外境
文章重見管中斑
篆烟縈曉留無寐
寶鐸吟風笑不閒

他日歸棲雖有地勝遊終寄夢魂間

姑溪居士前集卷六

欽定四庫全書

姑溪居士前集卷七

宋 李之儀 撰

律詩四 七言 五言

賞心亭

賞心亭角倚欄杆
虎住龍蹲自屈蟠
無復埋金銷勝氣
空餘飛鷺識前灘
百年名在人何處
萬里潮平雨送寒
幾向後庭更白紵
不堪殘照下魚竿

延之云累日把酒止在相近處殊不快人意坐
間命徧索城內外可以延處之地將往因之得
城南張氏園秋花班駁可喜遂劇飲待月上戴
花作樂而歸市猶未徹觀者如堵次致君韻

累日相看似處陰今朝乘興共追尋曲欄方沼爭留步
秀色新啼總會心酒面屢從羅綺發花心休被雪霜侵
燭城醉路凌初月但覺人山一徑深

偶書二首

閉門只欲渾無事門外何嘗有事來生計不須憂水旱
仕途休更問梯媒身安種種皆三樂客到時時共一杯
此外華嚴是歸處眼前樓閣竟誰開

小山相對數椽地樂與心期境自多有酒未妨同客醉
無情到了任君魔採薇行歌亦勞矣飲水曲肱還會麼
只恐時來把不住更看究竟事如何

贈人

落得清閒與物疎扃門終日似山居案頭新有歸田賦

架上元留緯世書紫府未須窮秘簡丹山重見引名雛
詔恩只亦來相繼還許頻為賀客無

和兩翁軒

何處又傳金碗出幾人爭看玉山顏幽情不是風期舊
異境難從指顧開猿鶴已回塵外駕烟雲休造眼中衰
未妨一老同巾履香火終年謝劫灰

次韻珪首座

陰重爐紅欲雪天氣氤氲香篆不藏烟南遊步步如同歷

西竺層層有舊緣未覺鷓鴣聲驚戶外似傳梅信到窗前
老來酒量無消息負此佳時一慨然

和錦繡亭

漂泊生涯寄一萍勝遊長記錦花亭山來已訝天能巧
春到方知地更靈雖許登臨追曳尾却應顏色未忘形
何妨共保千年約白帽回頭笑管寧

吳思道相送同宿崇因二首

端門風月十年拋垂老山林寄一瓢可得故人來市脚

共尋陳迹到江郊
麥黃且置塵中累
眉白欣投世外交
只恐話長清夜短
明朝去路不相饒

形單影隻久相拋
鼎食端能勝飲瓢
已分餘材辜北闕
元非不雨自西郊
求田聊復同中隱
玩世寧嫌瀆下交
千古平泉有遺恨
漫勞精爽畏文饒

寄僧

得皮得髓漫多門
實際圓融理自存
諭意當時纔一笑
還卿千日見三孫
維持佛法元無事
建立家山盡有文

占斷乾坤今鼎足會多哮吼慰傳聞

寄題吳思道橫翠堂

紅塵擾擾功名地不礙詩人得趣幽何必千巖連萬壑
能令六月似三秋茶甌變乳隨湯泛香篆縈雲盡日浮
時覺東城添紙價應知得句勝封侯

簡劉君東

劉郎本是風塵外畫舸新從越上來聞說露芽如爪活
更多溪楮截肪開雪消鼎面聲頻涌鶯轉池心首屢回

洗滌睡魔臨二景敢辭瓦礫換瓊瑰

黃庭有內外景

八月十一日九月六日二十四日三夢過趙仲

強家坐中人物笑語一一如平時因寄長句庶

蒙藻思見酬因投一會面之慰也

憶陪金醖醉紅顏回首風光杳靄間老去未忘三級浪
近來頻夢八重關雲烟舊路到何日燈火虛堂真似山
只恐斷魂收不得更須佳句與招還

水中登王德循月閣

龍宮海藏固聞誇偶襲初涼泛客槎層檻迴高臨落日
洞房無數盡浮家閭閻可想知何在水相連杳莫涯
借我華嚴記殘帙欲將因地付袈裟

德循詩律甚佳方幸拭目因作拙句以勉之

唐人好詩乃風俗語出工夫各一家前輩相因多自任
後來無復更相誇半山老子偏遊戲真一仙人每歎嗟
傍出豫章登一格憑君細與辨龍蛇

之儀家當塗七年矣屢過禪岳山下望高山塔

欲一遊輒不果異時山主懃公大師與其子宣
上人相過因往報之取路回遠薄晚方到遂留
宿棟宇一新舍次皆得其便而宏麗高朗唯見
者知焉又復規範齊肅鐘鼓應接問之乃懃一
力所就絲蓄粒聚未嘗毫髮資之人此尤難者
感歎不已因賦二小詩

窳堵頻經眼伽藍未息肩多情兩父子同住一雲烟繚
繞尋幽徑從容慰昔年本無留客意投分且遷延

去往如流水興衰似轉肩
新工幾奪目舊爨僅留烟
願起三千劫功收十八年
兒孫盡龍象家世自綿延

藏雲山居

鳥語晚更好山風秋轉涼
心閒日自永簾冷夢尤長
赤薦新春稻清添舊蔭香
此身歸有地去路尚何妨
雨後山尤好秋來方此時
心清覺老健步懶欲歸遲
林響驚鷗鼠風聞叫畫眉
善人吾豈敢去此尚何之

山居夏日

金鑲籠窗日黃繒蔽柳蟬戀鶯忘日轉借榻就涼偏好
作宿山計難堪被俗牽歸途迎晚照豫促渡頭船

誠上人遊方既歸林下焚香誦經以嚴報地相
見欣然留不欲去遂賦小詩

委曲披高下虛明得靜深佛香平日願經卷本來心地
據三車上塵無一點侵出山應有恨何處似如今

宿青山坊君錫館置甚款時方興圩

命駕追彭澤開懷得士龍殘寒偏惱客小雨未妨農已

幸同歸轍何勞更賃春川原如故里疑是舊栽松

將過黃池中路寒甚風猛不可行復歸青山坊

投宿

過午風雖惡此心難自安如何一時頃遂變十分寒忍聽僵夫訴還思昨夜歡祇應賢地主猶作故侯看

次韻俞希賢大暑家居寄天寧二老

靜退陶彭澤風流支道林論歡雖暫阻投分本來深客舍汗如洗僧軒雲正陰莫因俗眼礙終負勝遊心

姑溪居士前集卷七

欽定四庫全書

姑溪居士前集卷八

宋 李之儀 撰

律詩五

五言

和答友人二首

比日逢春社占龍得賁山雖能素願合未敢老身閒
家世綿延遠功名指顧間自應天有助一到一開顏

春來自多雨行處只逢山賦分皆可樂貪生常不閒人

歸挑菜處鳥語落梅間翻恨新增酒何從解醉顏

食笋二首

燕雀初為友烽烟近卜隣不嫌千語聒只怕一籠新病

眼常如睡歸心喜似人拌餐猶見笋未省已無春

牆外是西

關每夜得
應烽火

疎簾不礙日缺甃宛如塘默坐千名佛忘形一炷香卷
中貪味永鏡裏任顏蒼飲後纔推枕逡巡又夕陽

謝陳無已相訪

下直來天祿柴荆故遠求論心日恨短歸路雨無憂紅
葉繽紛晚黃花爛熳秋會須尋此況擊節再相酬

昨日偶到北觀蒙君俞元載元發明叔惠然見
過

勝日欣相得曠懷誰與同如何四君子肯顧一衰翁林
杪收殘雨簷牙遞好風歸時不須問更待月如弓

回酒

莫笑和州酒和州酒却醇聊資千歲祝用贊一陽春柳

信過將報梨晴點向真醉尋平日路好在武陵人

書長干僧房

異日延禪地今朝選佛場真身瘞堅固層級韻琅當雨
灑家家潤燈傳處處光曾將一則語要路截諸方

無題三首

邂逅俱青眼招攜媿白頭穿林猶畏日坐石忽驚秋不
作崎嶇倦幾成汗漫遊臨分懷杜老月湧大江流

步武高低外生涯夢寐中不知三徑足信是一生窮觸

目如逢舊隨緣似有功便應參羽翼何異注魚蟲
軒廡千尋碧江山一抹紅微吟接僚友健啖趣羣童戀
別猶能暫論懽昔已通更憑將此況遠問雪溪翁

題歷陽天慶觀自然菴

一日復一日新年即舊年本來無欠少強自起攀緣妙
悟通三境清風寄七絃昇騰如未果且作地行仙

自大乘將遊湯泉道中

迢迢山路永漠漠曉風昏雨歇鳩呼婦年豐稻有孫旅

懷悲暮齒野飯寄前村只恐今霄夢憑誰續斷魂

雨中過明覺招上人輒留小詩

雨路如投洗山行似踏繩深聞逢竹院歡喜得詩僧語
款疑繯蠶心明自有燈難忘惜別處高義等丘陵

宿滴水巖懷趙德麟和壁間韻

瀑水瀉靈竇鏗鏘韶濩音樹深猿嘯月山迴鳥歸林一
曲廣陵散再歌梁甫吟天邊有鴻鴈莫寄此時心

夜行輦洛道上

夜久露華重寒鴉不肯棲月推銀海上斗過玉繩西風
脫林衣瘦山擎雲帽低流螢三四點趁隊過前溪

題李欽之承事宅

松竹龐公宅丘墳倚相家和聲敦鴈序秀色茂蘭芽魯
秉方如昔淮流詎可涯躊躇不欲去寒日任西斜

離宣城

倦客登舟際江城欲暮時恨長山自遠心速棹歸遲村
市明魚火嚴城起鼓鼙詩成真有助新月上天涯

秋日遊青山訪太白墓二首

潦倒忘衰日風流襲墊巾未能分朽骨還此挹餘塵
弔古無千載傷心為一顰依稀如到眼氣類信吾人
淹時苦炎暑此日遇初秋舊籍存千畝曩倫詠九疇
但能尋曠蕩何必事深幽未媿遼東笑真成知北遊

遊青山因過西莊

青山忽相值一笑脫征衫未就三都賦聊尋五柳潛
並遊雖得意作濶更愁魚問字終忘倦言歸但小慚旁求

須作相未聘且耕巖贈別無多語提身要律食

同榮天和遊石城

茲遊久寂寞勝士偶陪隨竹暗笋初熟江深鱸正肥但
須頻結社何必訪題詩會有重來日還應記此時

謝人送魚

珍重黃池秀風流迥出塵多情念羈旅脫網寄鮮鱗
振動龍蛟宅驚回七箸春丹青如得便更擬問通津

題齊雲亭

凌空登白紵此地與雲齊一覽衆山小方知人世低暫
留蝴蝶夢終負杜鵑啼回向禪關客何當別有梯

賀時相生辰

錫羨來經世儲休表降神雲間瞻鸞驚天上識麒麟蘊
藉三冬學形容萬古春班庭傾玉筍鎮廟契金人帝載
熙明格朝簋絕擬倫淵源參密幄同德在斯民有作皆
前用無言不緒陳光華榮暉壽蕃錫會昌辰寵接張侯
異年頒衛武均江干空引睇無路襲餘塵

姑溪居士前集卷八

欽定四庫全書

姑溪居士前集卷九

宋 李之儀 撰

絕句一

登山未還范景仁以詩見促次韻二首

撲面烟霞曉更嘉
偶隨藜杖訪仙家
斜陽不見登山屐
獨遶長溪折夜花

危牆烟際聳層城
潮落沙頭眼更明
不覺歸舟犯牛斗

天風吹下步虛聲

次韻景仁海次西還二首

留滯初春寂寞濱
眼明歸路一番新
何妨更作重來計
枝上微紅解惱人

二月春陰到水濱
秋風重見玉蟾新
無端擾擾來還去
只恐沙鷗解笑人

又次韻

尋春何惜駐征鞍
只怕春歸不怕寒
故國山川無限思

我來仍得雨中看

栢臺自述四首

窮日惜惜已死灰似沈習井念昭回一聲霹靂起平地
頓覺青天萬里開

鑽龜打瓦不曾休金注昏人豈自由誰謂純誠無感格
會逢公議報私讐

一夢揚州似隔生輕舟未往但貪程莫年敲鯨兒童念
風物依稀稀媿此情

熬熬內火戰驕陽
鶴淚風聲便著忙
波浪翻天誰與渡
却應甘井是慈航

江西莊上久雨

去秋欲雨不得雨
今春望晴還未晴
螻蟻尚知為自便
強將私意與天爭

路西莊絕句

麥未登場已插秧
更憂雨過水還傷
一生能著幾量屐
白髮蕭蕭祇管忙

宿采石

江聲隱隱風前恨
鴈陣喧喧枕畔愁
更覺孤衾如潑水
始知今夜宿山頭

寄西莊梅道者

因緣時節本相期
只恐蹉跎醉似泥
洗盡捉前留意處
何憂金臂不提攜

偶書二首

元宵燈火鬧遊人
偶向忙中得此身
淨几明窗塵不到

弄黃先見一枝春

通中玉冷夢偏長
花影籠階月浸廊
挽斷羅巾留不住
覺來猶有去時香

瑞竹即事三絕

芭蕉葉密柿陰濃
散髮西窗到晚鐘
霹靂一聲三尺水
旱天方信有真龍

纖絺不掛汗如傾
一霎風來夢乍驚
自是人心有涼思
強將庭葉作秋聲

鴨脚初成綠未齊
芭蕉仍在柿陰西
推遷節物均如此
眼界何須苦自迷

書扇

會稽陳迹久荒蕪
流落江城墨未枯
好向溪邊示行客
問人能出百錢無

立秋日書唐行成扇

自古逢秋悲寂寥
我言秋日勝春朝
晴空一鶚排雲上
便引詩情到碧霄

題郭熙畫扇

寒驢破帽聳鳶肩
石裏長松欲到天
六月塵埃汗如洗
始知立意不徒然

嫋嫋涼風八月初
試揮椽筆寫江湖
還家預想迎門喜
爭問今年得意無

又書扇

幾年無事在江湖
醉到黃公舊酒壚
覺後不知新月上
滿身花影倩人扶

畫夫子扇

烟梢雲頂石藏根
溪壓輿梁曉乍分
車蓋定尋何處路
皇皇猶想為斯文

題畫扇

魯記終南雪裏山
玉峯瓊岫聳巔峴
風流轉入丹青手
畫作江城六月寒

落筆無因似退之
每逢佳致却如癡
孤高全露秋來骨
無復山紅澗碧時

莊上書事

柱礎猶蒸濕未休懸知雨意未全收只憂場上芽生稻
不厭田間水拍溝

訪僧不值

我來獨愛南天竺公去誰烹北苑茶賴有清風猶好客
掃門楊柳影交加

天寧衆寮即事

不看經也不參禪時去時來又一年祇願闍黎終有信

大家留取草鞋錢

宿古先之學古堂

停驂假館雪初晴學古堂中氣象新多謝故人無棄我
一爐軟火煖如春

書子子高宅

兒童雞犬語聲喧桑柘縈紆綠蔽川斗覺門庭蘭玉盛
更將蕭鼓樂豐年

書俞秀老詩卷後

荆公賓客晚多奇休歎攘侯見事遲雨過半山初睡足
何如蟲力負山時

荆公晚有佳客乃其自
云魯直遂因為故事

寫裙帶

輕裙碎摺曉風微弱柳腰肢穩稱衣更剪垂虹平窄地
雙鳬似恐見人飛

采石二首

雲山夾岸去層層來往扁舟恨未能更有尋常最佳處
無風一日到金陵

雞籠山下是和州隔岸聞呼見點頭不見東歸夜郎客
錦袍誰共醉扁舟

浴南寺園頭求詩

一重洗盡一重生塵垢昏人不自醒會得栽茄種瓜意
始知松竹本來青

源上人研

過嶺傳衣不傳鉢何事眼裏更着柶欲識黃梅半夜心
踏着稱鎚硬似鐵

訪采石臻山主不遇

入門不見主人公
座具袈裟在眼中
更有山童會人意
畧無一事許相同

十年采石寄漂蓬
廣濟雖名寺亦空
將為新來有消息
依前山不結蓬籠

次韻湖陰韋深道五小詩

髭鬚瀟颯面嶙峋
怪我多非舊日人
百里挈舟誰復爾
却應情重故情親

書去書來又一年祇應提處是虛鞭相逢會得筆頭語
莫惜頻尋酒裏天

江頭風浪似重關幾許行人限往還不是多情過相與
肯將一葉犯銀山

三山磯雨列山風我亦頻年強自攻不負蛟龍竟何事
祇疑身世屬江東

新來句法宛如陰端與袁公伴陸沈未易偏師壯秦系
劉郎戈甲舊成林

次韻東坡梅花十絕

誰人月下奏雲和一夜繁枝向北多
長笛未須論舊恨且留幽思待陰何

奸雄投老戀層臺隨得分香散處開
枝上休論歌舞舊尊中且泛綠於苔

弄藥攀條日幾回依稀長記雪中開
塵埃滿袂家山遠底事多情拂眼來

軟火明窗酒一尊餘盃未減日尤昏
誰人為折東來閣

續得何郎日斷魂

黯黯危腸獨九迴故園誰對此時開
撚來聊把倚孤枕更擬慙慙入夢來

病餘憔悴拊空尊子細思量意却昏
便覺陽和振枯槁不須方士致幽魂

初見今年報信花定從清淺綴橫斜
無言對我應惆悵不復當時處士家

玉作肌膚雪作衣剪裁風月綴寒枝
上池可飲偶無路

空愧當年帶下醫

漏泄天工意不輕
傍春依臘獨分明
孤高不作繁紅伴
造化須知別有情

姑射山前舊卜家
天香真色倚風斜
不須薝蔔分高下
要是東皇第一花

贈呂煥

紅爐歡坐臘燈長
豫借春風發艷粧
流水落花無限好
却應雙鬢恨劉郎

姑溪居士前集卷九

欽定四庫全書

姑溪居士前集卷十

宋 李之儀 撰

絕句二

舟泊采石

經年欲到竟無繇，便路今朝得暫留。
弄月燃犀俱未暇，潮平且欲過西州。

和州太守曾延之置酒鼓角樓

樓臺烟樹接平蕪水墨丹青十幅圖認得黃山家住處
雲中相對似相呼

延之置酒當利樓侍人勸酒

雲山遠近淺還深宛轉愁顏頓不任獨有綺羅知此意
故拈金盞十分斟

延之置酒連雲觀北望丘墟掩翳相與凭欄感
歎延之以所持扇見授云不可不記也因書之
後墮前岡一色松相看冠劍幾悲風今朝笑語明朝哭

莫厭尊中酒不空

延之置酒南園因書柱上

尊前景氣朝朝別
醉裏歌呼處處新
一度枯來一回好
主人須信異于人

何子溫家有巨竹數頃因成絕句

老綠陰森鎖畫寒
兒孫延裔不知年
欲歸頓失來時路
一似高風暗雨天

曾延之置酒後閣供帳酒饌物物皆內出侍人

以裙帶求書

御醅盞畔千頭菊，掾燭光中四和香。
紅粉莫嗟霜滿額，也應歌處似周郎。

延之問及當塗近事，云君殆能容忍，我不及也。
胡不遷居于此，便治館因口占為謝。

胯下淹時豈不知，故人疑我似陽癡。
一厘固願授陳相，只恐鋒車便見追。

延之云：久遲公來，不謂迫之乃肯顧我。既開此

路却當以匪人為津梁矣致我佳客敢忘其德
口占為戲

一水相忘輒自疲青瑣情厚失先期從今不比鸕鷀數
更欲棠陰借異時

雜詠四絕

人間所樂寧過此一事都無有俸錢更向豐年觀割稻
須知身是地行仙

老呼稚舞報豐年極目黃雲欲際天旋搗新稗供晚飯

只愁閒夢攪安眠

解釋新篁綠未分
晴啼鳥語如文翻
風葭莢全疑雨
對岸峯巒便是雲

平生粥飯寄伽藍
老日田園強自添
豈自着靴踏泥客
如何不許蹙深潛

書龔彥本莊壁二絕

青黃赤白千畦稻
遠近高低四面山
舊約買鄰今已決
却憂無力伴躋攀

重陽過了十二日階下黃花方盛開節物參差何足較
且浮新藥共銜杯

同彥本兄弟泛舟過北山

橫截西山一葉輕曉食初發鏡中行異時常作玻璃觀
却恐丹青畫不成

彥本鄰莊有欲售其所舍之屋看相與就閱遂
書其屏上與彥本為約

求田問舍太遲生棟宇纔逢眼便明憑仗經營須占早

連牆祇恐負柴荆

龔深之曾約相從偶不及而深之逝矣獨過其所約之地遺像儼然感愴不已因書其事

德公期我此聯裾獨捨扁舟斷夢初蕙帳一燈如晤語
淚痕空對兩龍駒

初入褒禪山

近山回抱錦為屏金碧高低照眼明
四十年來勞夢想
白頭方喜慰平生

褒禪知客求書因以答之

霜林斑駁抱園回
曉日初昇宿霧開
憶得舊遊懷小杜
分明回望繡成堆

褒禪齋後獨出三門步深山久之

兩脚都忘力不勝
穿雲度壑信騰騰
林深鳥獸知無迹
時見遊山一兩僧

遊華陽洞行十餘步水阻而回

洞在褒禪側有呂公書華陽後

門字

篝火宵深興轉濃
可憐潭水斷來踪
祇疑終有蛟龍護
玉室金堂未許逢

自褒禪寺東轉將過大乘路中

不覺離家二十日
山林城市恣延緣
定因曾作和州客
長見雞籠在眼前

欲過大乘先寄祖燈禪師大乘甚貧新開堂

大乘此去有幾里
聞道祇園近布金
但恐鉢中無客飯
止期經宿謝知音

將過大乘薄晚不能到既見祖燈以寄一笑

踏盡田塍轉盡山芥塘猶在夕陽間主人縮地元多術

何事今朝時見慳

芥塘大
乘地名

湯泉纔到便問浴處何在戲呈長老

欲從曠口過金陵不惜湯泉兩日程因就故人求一浴
何妨隨例得身輕

題苦竹寺後亭

竹映丹楓轉短籬有花開處盡空枝春風想見如鋪錦

惆悵來遊不是時

再過苦竹飯于寺前客邸

隼旗誇呼引紅粧花帽追隨入醉鄉今日再來如斷夢

主人依舊進黃梁

絕句七首

海燕初飛掠水輕
醪醕開就照人明
旋傾煮酒嘗青杏
唯有風光不世情

萬腔腰鼓打梁州
舞罷還催步打球
更借纏頭三百萬

阿奴要轍第三籌

情隨榆莢不勝飄
心似楊花暖欲銷
擬借瓊林大盈庫
約君孤注睹妖嬈

漫尋蝴蝶却成癡
欲趁蜂兒轉更疑
自是心情怕時節
不如閒處伴黃鸝

程氏園當尺五天
千金爭賞並朱欄
莫因今日家家有
便與常時兩樣看

的的枝頭淺淺黃
未先顏色占年芳
任是剪成香更裂

鼻根眼界漫商量

齋盂洗罷日方中
簾影低回破睡風
試問新浮一甌乳
何須親到廣寒宮

和張文潛贈楊妹

草草聲名等漏卮
相逢佳處暫舒眉
我方擊節聊乘興
君可忘憂莫見疑

宿觀音寺三絕

倦聽簷間點滴聲
棲禽初報曉來晴
分明市合人爭語

清濁高低各有情

鳥啼鵲噪趁初晴
百舌新調燕羽輕
滑滑竹雞催布穀
聲聲鷓鴣喚流鶯

留滯江南又一年
燕巢初就鵲聲喧
一番風竹搖窗外
猶冀曾來紫玉軒

謝范守惠鵲

玉翎紅觜小池中
雙入筠籠寄病翁
不是山陰親換得
自慚書學久無工

畫鴨

野塘浴漾夕陽時
風淡雲閒草半欹
會得騰身振衣否
不教春色在花枝

道人筆力與春爭
五彩都將墨染成
新浴羽毛猶更葺
似疑顏色未分明

畫鵝兒

聲裡生涯殼外天
天真雖判尚茫然
只應未解長依母
每向沙頭獨自眠

畫鵝

人間今復見丹青
生意初侵造物靈
却笑山陰何所得
尚須辛苦寫黃庭

姑溪居士前集卷十